

**Ulloq 1. juuli 2020 aallarnerfigalugu ATV-nut qamuterallannullu akitsuutit peeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

**Akissuteqaat**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Siullermeerinnineq**

2018-imi ukiakkut ataatsimiinnermi qamutitut motorilinnut akitsuutit allanngortinneqarnissaat pillugit inatsisissatut siunnersuutit marlunnik Naalakkersuisut saqqummiussipput. Siunnersuutillu ilaatigut qamuteralaat qamutillu motorillit minnerit nunaannakoorutit eqqunernerini akitsuutaasa atorunnaarsinneqarnissaannik siunnersuutit imaqarput.

Qamutit angallatit taamaattut ingammik sumiiffinni aalisartoqarfinni piniartoqarfinnilu amerlanertigut illoqarfinni nunaqarfinnilu minnerusuni qamutitut motorilinnut nalinginnaasunut sanilliullutik naleqqunnerunerat atorunnaarsinnaanerunerallu, qamuterallannut qamutinullu motorilinnut minnerit nunaannakoorutit akitsuutit peerneqarnissaat pillugu siunnersuummut tunuliaqutaavoq.

Qamutit motorillit minnerusut nunaannakoorutit ATV-nik UTV-nillu taaneqartartut tassaapput qamutit motorillit aqqusernit avataanni angallatit immikkut naleqquttut kiisalu qamuteralaat, taakkulu ullumikkut Kalaallit Nunatsinnut eqquneqarnerannut akitsuuserneqartussaataapput.

Taamaalilluni qamuteralaat ataatsit eqquneqarneranni akitsuut aalajangersimasoq 22.000 kr.-nik akilersinneqartarpoq, qamutinullu motorilinnut minnerit nunaannakoorutit ataatsinut akitsuut 5.000 kr.-nik akilersinneqartarpoq.

Qamuteralaat qamutillu motorillit minnerusut nunaannakoorutit eqquneqarnerini akitsuutip atorunnaarsinnaannik siunnersuut arlalinnit isumaqatigineqarpoq, qamutillu motorillit akitsuuserneqarnerisa allanngortinneqarnissaannut siunnersuut ataatsimoortoq Inatsisartuni killilimmik taparserneqarluni.

Qamutit motorillit akitsuuserneqarnerisa allangortinneqarnerannut siunnersuummut ataatsimoortumut killilimmik tapersiinerup, Naalackersuisut qamutit motorillit akitsuuserneqarnerisa allangortinneqarnerannut siunnersuummik nutartikkamik saqqummiussinissaq siunertaralugu siunnersuummik tunuartitsinissartik toqqarpaat, tamannali siusinnerpaamik 2019-mi ukiakkut ataatsimiinnermi pisinnaasoq.

Akitsuutit allangortinneqarnerannut siunnersuummi nutaami kingullermik qamutitut motorilinnut akitsuutit allangortinneqarnissaat pillugu siunnersuummik saqqummiussinermut atatillugu isorinnissutaasunut naaperiaateqassasoq naatsorsuutigineqarpoq, taamaattoq siunnersuutaqqaartumi 2018-mi Inatsisartut ukiaanerani ataatsimiinneranni ilaanik aamma imaqaassaq Inatsisartuni tapersemaqarsimasumik.

Ataatsimoortumik siunnersuutissaq isertitanut sunniuteqarnanilu allanik naapertuuttunik ikorfartuinissaa Naalackersuisut aallaavigissavaat, tassani avatangiisinut attuumasut ilanngullugit, tamannalu akitsuutit allangortinneqarnissaannut saqqummiussami kingullermi aamma toqqammavigineqarpoq. Qamuteralaat qamutillu motorillit minnerusut nunaannakkoortit eqqunneqarnerini akitsuummik atorunnaarsitsineq taamaalilluni assersuutigalugu qamutit motorillit allat akitsuutaasa allangortinneqarnerisigut oqimaqatigiissaarneqartariaqassaaq.

Tamanna tunuliaqutaralugu allannguutissatut siunnersuut tulliuuttoq Naalackersuisut saqqummiutissavaat:

*Qamutitut motorilinnut akitsuutit ataatsimut allangortinneqarnerannut atatillugu isertitanik iluanaarutitut sunniuteqanngitsumik atorunnaarsinneqarsinnaassappata qamutitut motorilinnut akitsuutit allangortinneqarnissaannut atatillugu ATV-nik qamuteralannillu eqqussinermi akitsuutit atorunnaarsinneqarnissaannut periarfissaq naliliiffigeqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.*

Taamaalilluni qamutit motorillit akitsuutaannik allangortitsinissap isertitanut sunniuteqannginnissaata qulakkeerneqarnissaa allannguutissatut siunnersuummi pingaarnertut anguniagaassaaq.

Qamuteralaat qamutillu motorillit minnerusut nunaannakkoortit immikkoortillugit eqqussorneqarneranni akitsuutaannik atorunnaarsitsineq qamuteralaat ATV-llu ukiuni tallimani eqqussorneqartarneranni iluanaarutit agguaqatigiissinnerat aallaavigalugu, pisortat karsiinut ukiumoortumik 6,8 mio. kr.-t missaannik isertitakinnerulersitsissasoq naatsorsuutigineqartariaqarpoq. Akitsuutinilli atorunnaarsitsineq qamuteralaat ATV-llu eqqussorneqarnerulernerannik kinguneqassasoq ilimagineqartariaqarpoq, taamaammallu isertitanik annaasassarpiaq qaffasinnerulaassasoq naatsorsuutigineqartariaqarpoq.